


SXEKS TA NT'ÁKMENSA I P'EGPÍG7LH.HA



CONSTITUTION

JULY 14, 2007

MAP OF THE ST'ÁT'IMC TERRITORY



Skw7ikwlacwkálha

**Nilh ts7a skw7ikwlacws i P'egp'íg'lh7a
ucwalmicw. Ts7as lhélta scwákwekw
kalha i sqwal'útkalha.**

**S7ats'xstsútkalhelh muta7
s7ats'xstwál'. Cuz' hal'acítem ku
tí7texw nt'ákmen I stsmal'tkálha.**

**Xekantsútkalhkelh. Cuz' nkialstúm' ta
tsuwa7lhkalha nt'ákmen ts'íla nelh
skelkl7lhkálha múta7 kelh i ts7ása
Úcwalmicw.**

Wa7 Qwal'útmin'em ku Cuz' Kensxílemlhkalh

Wi snímulh P'egp'íg'lha lhélta St'át'imca Ecw7úcwalmicw, kitsin'túmulhas lts7a ta Kwil'stenlhkálha; cw7aoy's kwel'hkálh kakélha lhelta tmícwkalha. Wa7 nlham' lta nqwal'uttenlhkálha múta7 esméts lta tmícwkalha i nk'ul'tenlhkálha, i nxekmenlhkálha, múta7 ta nt'akmenlhkálha. Lhélna scín'sa, nilh i sqwéqwel'a muta7 i sptákw'lha qwezenítas nelh skelkla7lhkálha lhtsunam'enítas i stsmál'tiha muta7 i i7matsíha. Wá7lhkalh aylh gelílc kwas k'úl'citem kwel'h ts7ása úcwalmicw ku áma nt'akmen, xílem t.stsunam'entumulhása nelh skelkla7lhkálha.

Cúz'lhkalh aylh:

1. Xzúmstum' ta Nkwil'stenlhkálha múta7 tákem i wa7 sk'úl'ems, wi snímulh úcwalmicw múta7 tákem i núkwa wa7 lak lta tmícwa.
2. Amhaka7mínen i tákema.
3. Zwátet.stum múta7 qwezeném ta St'át'incetsa.
4. Nkálstum' ta tsuwa7lhkálha nt'ákmen, nilh aylh múta7 stsunám'enem i s tsmál'tkalha kwas nkalstwítas.
5. Xekantsút ts'íla t.stsunam'entumulhása nelh skelkla7lhkálha.
6. Nílhmin'em i tsuwa7lhkálha száyten, nilh t'u7 scw7aoy's kw sxelenlhkálh ku stam'.
7. Metseném i wa7 wenácwnun'em múta7 i wa7 xát'min'em nilh kws tákem s wat cuz' zwatenítas.

Nilh iz' cuz' nuk'w7antúmulhas kwas nkálstum' ta tí7texwa nt'ákmenlhkalh.

KU KÉLA7 SQWAL'ÚT

Wi snímulh P'egp'íg'lha lhélta St'át'imca Ecw7úcwalmicw,
lhélna scín'sa t'u7 swa7s wá7 múta7 alkst lta tmicwkálha i cín'a
skelkla7lhkálh. Kitsin'túmulhas lts7a ta k'ul'un'tumúlhasa kwas
s7áts'xstum múta7 szúhmin'stum ta tmícwa. Nilh kwelhkálh áma,
múta7 s7át'sxstum ta tmícwkalha, wá7lhkalh t'it szuhmin'stwál'.

Cw7aoys t'u7 kw slhwálnem múta7 cw7aoys t'u7 kwas náscitem
ku swat ta tmícwkalha. Nascitúmulhas ta tmícwa i skelkla7lhkálha.
Nascitumulítas, nilh kwas s7áts'xstum múta7 szúhmin'stum.

Tsulhaká7 ku7 i smétsa nxékmen wa7 nkálstum'. Wa7
s7áts'xstum múta7 szúhmin'stum ta tmicwkálha nilh kwas wa7
estmícw i ts7ása stsmál'tkalh.

Cúz'lhkalh t'u7 gelilcmínem kw s7ámas ku swá7lhkalh múta7 kw
s7ámas ku swa7s kwelh ts7as stsmál'tkalh, kwas t'u7 nkálstum' i
stsunam'entumulhása i skelkla7lhkálha. Cúz'lhkalh gelílc
kwelhkálh nkálstum' i stsunam'entumulhása ta Sk'ul'tenlhkálha,
kwas t'u7 s7áts'xstum ta tmícwa. Cw7aoz kw sts'ílas kwas

tsuwa7mínem, tsukw t'u7 kwas s7áts'xstum, nilh ti7 wa7
stsunam'entúmulem ki skelkla7lhkálha. Lhwas qwal'útmin'em ta
tmícwa nilh wa7 tsúnem ta nwa7tenlhkálha, láti7 lhwas
qwal'útmin'em ta tmícwa, ta qú7a, ta gwélpa, ta wa7
súp'umlhkalh, muta7 tákem i wa7 máwal' lta tmícwa. Nilh izá
tsuntumúlem kwelhkálh xílem.

Wá7lhkalh cuz' papt wa7 gélgel, múta7 cúz' papt wa7 áma ta
scwakwekwkálha, múta7 papt wa7 cuz' xweystúm i stsmal'tkálha,
múta7 páptkalh kelh wa7 um'náy'lh, múta7 papt kelh wa7
núk'w7anem i tákema, múta7 papt kelh wa7 múzmit.stum i tákema
t'u7, múta7 papt kelh wa7 xzúmstum' i á7x7a, múta7 wá7lhkalh
kelh kat'ék't'k'ema kwas k'alán'min'em kwa qwal'ut.stum'úlhas.
Nilh izá wa7 tsuntumúlem kwelhkálh xílem. Nilh iz' wa7
k'alán'min'em múta7 nkálstum', nilh kwas t'ak t'u7 áma ku
sxílemlhkalh.

Wa7 t'it xzúmstum' ta “Xzúma Pípas nelh Kukukwpi7lhkálha”
metsnítas i May10-as 1911. Nilh wa7 nkálstum' múta7 wa7

wenácwnun'em. Cw7aoz kw scúz'kalh málham t'u áts'xnem kelh
kw splans wa7 smets kwas tsúwa7lhkalh ts7a ta tmícwa, múta7
snímulh i wa7 estsúwa7 múta7 cúz'lhkalh xílem ku sxát'kalh.

Wá7lhkalh aylh tsut kwas plan wa7 cuz' qwezném ta "Sxéksa ta
Nt'ákmensa i P'egp'íg'lhha." Tákem swat wa7 qwezentáli.

Cúz'lhkalh t'u7 t'anamílc kwas cuz' nkálstum' izá: kwelhkálh papt
wa7 gélgel múta7 amhálhts'a7; kwas áma kwa scwákwekwkalh
papt; kwas xweystúm papt i stsmál'tkalha; kwelhkálh papt wa7
um'náy'lh múta7 nuk'w7ay'lhminem i tákema; kwas múzmit.stum
i tákema; kwas xzúmstum' i á7x7a; kw swá7lhkalh papt lámcal;
kw scw7aoys kwelhkálh wenácwtsam', kwelhkálh t'ék't'k'em
kwas k'alán'min'em kwa sqwal'entúmulhas, i sna7emlhkálha
múta7 i núkwa wa7 qwal'ut.stum'úlhas. Nilh ti7 wa7
stsunam'entúmulem ki skelkekla7lhkálha nilh kw swa7s áma ta
sxilemlhkálha; nascitúmulhas ts7a ta tmícwa, xat'min'túmulhas
kwas s7áts'xstum ts7a ta tmícwa múta7 i tsúlhak7a smáwal's i
ts7ása stsmál'tkalh.

Wa7 aylh qwezném ta Pípasa i P'egp'íg'lhha, nilh ti7 wa7
nkálstum' kwas nxekmenlhkálh, tákem aylh i ecw7ucwalmícwa.
Cw7aoz kwelhkálh cuz' málham t'u ats'xném kelh kwas esméts
lku pípa kwas plan tsúwa7lhkalh tákem ta tmícwa. Wa7
xát'min'em kwas tákem wa7 zewatentáli múta7 kwas xzumstwítas.
Plan kelh wa7 esméts kwas tsúwa7lhkalh tákem ta tmícwa. Plan
kelh wa7 xzumstwítas i tákema. Nilh kelh aylh scúz'lhkalh ts7as
ka7ámha. Ts7áskalh kelh aylh cuz' lhaxw lhélki tákema
smets'usentúmulhas i sám7a lhélna st'íqiha.

Tákem i snek'wnuk'wa7lhkálha.

ARTICLE I: TA TMÍCWA

Wi snímulh P'egp'íg'lha lhélta St'át'imca Ecw7úcwalmicw,
scin's t'u7 kw swá7lhkalh wá7 lta tmicwkálha wa7 qwezném.
Palla7mintwal'lhkálh t'u7 lta tmícwa. Wa7 kwánenstum i
tsitcwkálha, i stem'tetem'lhkálha, i s7ilhenlhkálha múta7 i
meláomena lhélta tmícwa - múta7 ta nqwal'uttenlhkálha, ta
nt'akmenlhkálha t'it. Ka lhligwinémas ta nt'akmenlhkálha múta7
ta tmícwa, nilh ka scwaz'antsútlhkalh. Cw7aoz kwas
ncw7an'tumúlem kwelhkalh xílem, kwas qv́lwíil'canem ku stam'.
Wa7 t'u7 xát'min'em kwas áma kwa swá7lhkalh. Wa7
s7áts'xstum tákem i wa7 lak kénta tmícwa, ta swá7sa xzúmstum'
tákem i sk'úl'sa ts7a lta tmicwa ta sK'ul'tenlhkálha.
Wá7lhkalh kawá7a lts7a lta tmícwa. Plan wa7 nahném tákem i
wa7 lak lta tmícwa ku St'át'imcets snah. Wá7lhkalh t'u7 lts7a ku
tmicw, múta7 snímulh, lhcw7áozas kw s7áts'xstum, cw7aoz t'it
kwelhkálh s7ats'xstsút. Nilh ti7 s7áلكstkalh kwas szúhmin'stum
ts7a ta tmícwa. Wá7lhkalh zam' s7áts'xstum ts7a ku tmicw múta7

tákem láti7 i wa7 máwal'. Wa7 kelh s7áts'xstum ta tmícwkalha,
nilh scuz's tmicws i ts7ása stsmál'tkalh.

Wa7 wi7 xweystúm ta tmícwa múta7 i stsmál'tkalha. Plánlhkalh
wa7 snahstúm ta tmícwa nilh kelh swa7s zewatenítas kwas
xweystánemwit t'it i stsmál'tkalha. Wá7lhkalh s7áts'xstum kw
scw7aoys kwa kaqṿlwiil'cstal'íha. Wa7 séna7 ncw7án'em i núkwa
kwas wá7wit lta tmícwa, tsukw t'u7 kwas amhaka7mínitas,
cw7áozas kw sqṿlwiil'cstwítas ta tmícwkalha. Tsukw t'u7 ts7a
tmicws i St'at'ímca lhelts7á T'ít'q'eta, P'egp'ig'lha lhwat
nahentsút.

ARTICLE II: I UCWALMÍCWA

Wi snímulh P'egp'íg'lha lhélta St'át'im'ca Ecw7úcwalmicw,

nilh izá skelkekl7í i wa7 wá7 lts7a T'ít'q'eta lhkúnsa:

1. Ts'elpíken	Henry Andrew
2. Nq'sápal'us	David Billy
3. Sipá7a	Francis Bob's grandmother
4. Méses	Susan Bones
5. Tsem7áni	Annie Jim Pocock
6. Lemxátsa7	Mathias Charlie
7. Pápcen	Michael Doctor
8. Híksen	Paul Hixon
9. Tsupípn'ek	Susan Napoleon
10.	Ann Ottis
11. Ngításq'et	James Retasket
12. Múti	Timothy Sampson
13. Amíli	Amelia Saul
14. Txwín'ak	Nancy Scotchman

Wa7 zewátenem kwas tsúw7i t'u7 tmicw izá i Tít'q'etmeca, múta7

tsúw7i t'u7 száyten kwas szuhmin'stwítas ta tmicwíha. Tákem t'u7

i Tít'q'etmeca wa7 esméts lta pípha.

ARTICLE III: NQWAL'UTTENLHKÁLHA MÚTA7
NT'AKMENLHKÁLHA

Wi snímulh P'eg'p'íg'lha lhélta St'át'imca Ecw7úcwalmicw,
pála7 t'u7 ta wa7 qan'imtsán'em nqwal'úttén múta7 pála7 ta wa7
wenácwnun'em slámcal. Lta Cá7a St'át'imc tmicw (nkúkwem')
lhwat wa7. T's'elts'íl.hats lhwat qwal'út. Wá7lhkálh
qanim'tsán'twal' múta7 ts'íla lhwat lámcal.

Nilh i skelkekla7lhkálha wa7 sqelhtáli ta nqwal'uttenlhkálha
múta7 ta nt'akmenlhkálha. Nilh t'u7 iz' t'it wa7 tsunam'entáli i
stsmál'tkalha. Takemlhkálh t'u7 ts'íla snek'wnukw'a7míntwal',
wa7 t'u7 nkálstum' papt ta nt'akmenlhkálha. Lhéltá
K'ul'un'tumúlhasa lhas kwánenstum ta nt'akmenlhkálha. Tákem
t'u7 i láka lta tmícwa wa7 amamínem, tákem t'u7 wa7 esnáh lta
ucwalmícwtsa. Snek'wnuk'wa7lhkálh wi7 i tákema. Cw7aoz t'u7
kwas tsukw kw sptinusmínem. Ts'íla áti7 lhwas
tsunam'entúmulem.

Takemlhkálh t'u7 ts'elts'íla. Cw7aoz t'u7 kwas p'a7cw s7ámas ku nukw lhel wi snímulh. Tákem t'u7 stam' wa7 s7álkstkalh. Tákem t'u7 i wa7 qwezném wa7 kwánenstum lhélta Skicza7lhkálha ta Tmícwa. Stexw t'u7 xzúmstum' ta Skicza7lhkálha ta Tmícwa. Ts'íla t'it lhwas xweystúm i skelkla7lhkálha. Páptkalh wa7 lámcal t.swá7sa kwsut.stum'úlhas ki tákema t'u7 i wa7 áma wa7 qwezném. Wá7lhkalh t'it q'élza7 lhwat lámcal. Stexw t'u7 wa7 t'ákstum' i nxekmenlhkálha snímulh.

Wi snímulh i wa7 s7ats'xstáli i cúz'a t'ak sxílem i cw7áoza kw st'iqs, wa7 ptinusmínem kw swá7s t'u7 i tákema máwal' múta7 i stsmál'tkalha, nilh kwas t'u7 wá7wit áma. Wa7 t'it s7áts'xstum ta tmícwa múta7 ku s7ílhenlhkalh, ta nwa7tenlhkálha, múta7 tákem i láka lta tmícwa. Xzum ku7 ti7 ku nxékmens i St'át'imca.

Wá7lhkalh s7áts'xstsut, papt wa7 um'náy'lh, xzumstwál'lhkalh, celhcelhkálh. Wá7lhkalh gelílc lhwat alkst, nilh ta swá7sa ca7stúm tákem i wa7 nuk'w7antúmulhas, cúz'lhkalh xlítcal, um'náy'lh ku áma s7ílhen múta7 ku áma t'u7 stam'. Páptkalh wa7 lámcal, wa7

tsúnem 'Kúkwstum'ckacw' ta Kwil'stenlhkálha. Lhwá7at lámcal,
páptkalh wa7 qelqeltsín'. Lhwat tsut 'Kúkwstum'ckacw',
cúz'lhkalh xlítcal, nilh scúz'lhkalh um'náy'lh ku áma s7íhlen.

Wa7 nkálstum' izá i tsúlhak7a á7xa7 nxékmen:

1. Kwas s7áts'xstum i mezátskalha, i sptinusemlhkálha, múta7 i smawal'lhkálha.
2. Kwas ámhas t'u7 ku scwákwekwkalh.
3. Kwas xzúmstum' nelh tsulhaká7a skelkela7lhkálh muta7 kwelh tsulhaká7a cw7aoz t'u7 kw st'iqs.
4. Kwelhkálh nuk'w7antwál', t'u7 aoz t'u7 kwas náscitem i tákema.
5. Kwelhkálh muzmit.stwál', t'u7 núk'w7anem t'u7 i tákema.
6. Kwelhkálh gélgel lhwas xzúmstum' múta7 cá7stum' i tákema.
7. Kwas k'alán'min'em i tákema t'u7, ta Kwíl'stena múta7 i á7x7a úcwalmicw.

ARTICLE IV: KU TSÚWA7LHKALH S7ÁLKST MÚTA7 WA7
S7ÁTS'XSTUM

**Wi snímulh P'egp'íg'lha lhélta St'át'im'ca Ecw7úcwalmicw,
wa7 wenácwnun'em:**

- kw skwámemlhkalh ta tmícwa lhélta Kwil'stenlhkálha, nilh kwas tsúwa7kalh száyten kwa s7ats'xstáli.
- kwas t'u7 wá7 i skelkla7lhkálha lta tmícwa lhélta scín'sa t'u ekw7ú, kwas nascitúmulhas ta tmícwa i skelkla7lhkálha, cw7aoy's kwas klhaka7mínem.
- kwas cw7aoz t'u7 kwas papt cuz' ts'íla icín'as ku swá7lhkalh, wa7 wi7 kanák'a lhw's xát'mín'em.
- kwas cw7aoy's t'u7 kwelhkálh kazúsa múta7 cw7aoz t'u7 ku nukw kvpmen múta7 ku nukw ecw7úcwalmicw ku kacwaz'stum'úlhasa.

Wa7 zewátenem kwas snímulh i St'át'imca Ecw7úcwalmicw,
kwelhkálh kaxekantsúta. Wa7 ka xekantsút i tákema t'u7
tsetsítcwemten múta7 i zí7zeg'a t'u7 ku St'át'imc. Cw7aoz t'u7 ku

pápla7 úcwalmicw ku kacatan'tsúta scá7sa ta tsetsítcwemtensa
múta7 i St'át'imca Ecw7úcwalmicw.

ARTICLE V: TSÚWA7LHKALH KVP MEN

Wi snímulh P'egp'íg'lha lhélta St'át'im'ca Ecw7úcwalmicw,
áwanem snímulh i nxékmena wa7 tsel'ts'íla i wa7 nkalstwítas i
skelkla7lhkálha icín'as. Nascitúmulhas ta tmícwkalha ta
Kwil'stenlhkálha, nilh kwelhkálh s7áts'xstum múta7
k'wezúsmin'em, nkálstum' ta nt'akmenlhkálha, kwas t'u7 wa7
amhaka7mínem múta7 amhaka7míntwal', nilh kw swa7s t'u7
estmícw i ts7ása stsmál'tkalh. Cúy'lhkalh k'úl'em ku sMets sXek
kw swa7s k'alan'mín'túmulhas tákem i ucwalmícwa, nilh kw
swa7s ámawit.

Tsílkstal'us kvpmen i wa7 súcwtenem lku sMets sXeks i
P'egp'íg'lha Úcwalmicw.

Nilh izá wa7 súcwtenem:

P'egp'íg'lha Úcwalmicw-----Clan

P'egp'íg'lha Nk'sáytken-----Families

P'egp'íg'lha Qelhqelhmémen'-----Elders

P'egp'íg'lha Sgaw'p-----Council

T'ít'q'et Sgaw'p -----Chief & Council

Nilh aylh ta sMétsa sXeks i P'egp'íg'lha cuz' qwezném lhkúnsa.

Cuz' sucwtenítas i P'egp'íg'lh.ha iz' i tsilkstal'úsa kvpmen.

ARTICLE VI: ST'ÁT'IMC SNEK'WNÚK'WA7

Wi snímulh P'egp'íg'lha lhélta St'át'im'ca Ecw7úcwalmicw,
wa7 zewátenem kwelhkálh gélgel lhwá7at s7ul'l'usmíntwal' ku
Ecw7úcwalmicw. Wa7 wenacwnún'em tákem i ts'elts'íl.ha
slámcal; ts'ila ta nqwal'uttenlhkálha, ta nt'akmenlhkálha, ta
sts7áskalha, i sqweqwel'lhkálha, múta7 ts'ila ta tmícwkalha. Wa7
tsut ta Xzúma Pípas i St'át'imca kw sqwal'utcitúmulhas tákem.
Cúz'lhkalh nuk'wa7mínem i núkwa St'át'imc lhwas t'u7
kánemwit, tsukw t'u7 lhwas nuk'wa7mintumúlhas múta7
lhncw7an'tanemwítas éki P'egp'íg'lha Úcwalmicw.

Wa7 tsut ta Xzúma Pípas i St'át'im'ca kwas qwal'utcitúmulhas
tákem. Wá7lhkalh stálhlecc sq'út.sa i ucwalmícwkalha. Wa7 kelh

qwezném mǔta7 ts'níqwcitem mǔta7 szúhmin'stum kwelh
tsuwa7lhkálha száyten. S7úl'l'us kws cuz' ca7ném ta St'át'imca
Ecw7úcwalmicw Sxek mǔta7 i Smétsa Pípa ku Kvpmens i
St'át'imca.

Wa7 zewátenem kwelhkálh kaqwal'úta mǔta7 kaxíhtum'a tsukw
t'u7 ku áma sxílem kw ska7ámha i P'egp'ig'lh.ha, t'u7 cw7aoz
kwas kaqwal'útcitma i St'át'imca Ecw7úcwalmicw.

ARTICLE VII: I NÚKWA SNEK'WNÚKW'A7LHKALH

Wi snímulh P'egp'ig'lh.lhéltá St'át'im'ca Ecw7úcwalmicw,
wa7 zewátenem kwas kitsin'túmulhas ets7a lta Tmícwa ta
Kwil'stenlhkálha. Nuk'wa7mínem i cw7íta s7icwlh
Ecw7úcwalmicw lts7a lta Tmícwa, lts7a lta Skicza7lhkálha
Tmicw. Wa7 súcwtenem iz' kwas snek'wnúkwa7lhkalh, k'amalh
wa7 zewátenem kws cuz' ka ts'níqwcitem ts7a ta tmicwa, lhcúz'at
t'u7 máwal'.

Cw7aoz káti7 ku kaqwal'utcitumulhása k'a lhkalhiq'citumulhása ku stam', ku nqwal'úttlenlhkalh, ku nt'ákmenlhkalh, ku tmícwkalh, lhcw7aozas kw sncw7án'tanemwit éki P'egp'íg'lhha Úcwalmicw.

Wá7lhkalh tsutánwas kwelhkálh tí7texw lhwá7at cuz' metseném i pípha ki núkwa kvpmen múta7 kwelh nukw Ew7úcwalmicw. Wa7 i núkwa tsut kw scw7aoys kwas tí7texw ku7, t'u7 wá7lhkalh xílem snímulh.

ARTICLE VIII: K'ÚL'EM KU SQLAW'

Wi snímulh P'egp'íg'lhha lhélta St'át'im'ca Ecw7úcwalmicw, wá7lhkalh tsut kw snímulh kwa tsuwa7míntal'i múta7 qwezentáli ta tmícwkalha múta7 tákem i láka lta tmícwa, nilh kwelhkálh kwámem ku sqlaw' múta7 kwáncitem ku sqlaw' i ts7ása stsmál'tkalh. Wá7lhkalh tsut kws wá7lhkalh kas7a7zem'cítema múta7 katawminéma i tákema stam' lta tmícwkalha.

ARTICLE IX: KU NXEKMENLHKÁLH MÚTA7 KU
TSÚWA7LHKALH SZÚSCAL

Wi snímulh P'egp'íg'lha lhélta St'át'im'ca Ecw7úcwalmicw,
wa7 zewátenem kwas áma ka lhwá7at xekantsút múta7
s7ats'xantsút snímulh. Wá7lhalh gelílc nilh kws lháxwkalh lhelki
tákema qv̥l wa7 xilhtumúlem, kw spáptkalh amhaka7míntwal',
kws ka7ámha ta tmícwkalha múta7 ta nt'akmenlhkálha.
K'ul'citsútkalh aylh i tsuwa7lhkálha nxékmen, nt'ákmen, múta7
kvpmen.

T'alaném kelh stám'as t'u7 ku núkw kvpmen ku kensxekstúmulhas
múta7 ku kenskwancitúmulhas ku tsúwa7lhalh stam'. Nilh i
tsuwa7lhkálha nxékmen wa7 súcwtenem kw sp'a7cws sgélgels
lhelki núkwa nxékmen kentákem lta tmícwkalha.

ARTICLE X: TSÚWA7LHKALH SLÁMCAL MÚTA7 KU
WENÁCWNUN'EM

Wi snímulh P'egp'íg'lha lhélta St'át'im'ca Ecw7úcwalmicw,
wa7 zewátenem kwelhkálh cuz' lámcal kwa sxát'mín'em, múta7
kwas wenácwnun'em kwa sxát'kalh.

ARTICLE XI: WÁ7LHKALH KANÁK'STUM'A MÚTA7 MÁYSNEM I
SMÉ TSA PÍPA

1. Wa7 kelh t'u7 sXeks i P'egp'íg'lhha lhwas ul'l'usílc lta
pal7úlm'ecwa p'a7cw kws sáq'ulh lhélki wa7 ka7áwcala
P'egp'íg'lhha Úcwalmicw, nilhs met snítas i skwatsitsíha lta
sMétsa Pípa.
2. Wa7 kanák'stum'a lhnúkwas i Sxéka lhtsutanwaswítas i
P'egp'íg'lhha Úcwalmicw kwas cw7aoz iz' kwas tí7texw.
Lhxat'min'ítas kw snak'enítas, nilh kelh aylh ul'l'usílc
tákem i wa7 ka7áwcala. Lhpal7ú7pstas sq'em'ps lhélki
zí7zeg'a xet spqíqen'kst (80%) k'a lhp'a7cwas wa7 láti7
s7úl'l'us wa7 xat'min'ítas kw snak'enítas', nilh aylh
skamaystwítasa.

SXEKS TA NT'ÁKMENSA I P'EGP'ÍG'LHHA

Wi snímulh P'egp'íg'lha lhélta St'át'im'ca Ecw7úcwalmicw,
wa7 metseném i skwatsitskálha láti7 xáw'en'sa lts7a ta pípha, nilh
swa7s xekmenlhkálh i wa7 smets ts7áwna. Wa7 lhkúnsa ta
q'ém'pa wi xw7útsin sq'it.s ta spipántseka t'ánam'ten lta 2007-a
zánucwem.

A. I wa7 qelhqelhmémen' lhelta P'egp'íg'lha Tmicw

B. I wa7 P'egp'íg'lha Sgaw'p

C. I wa7 T'ít'q'etmec Sgaw'p

D. I nk'sáytkenza sTs'elpíken

E. I nk'sáytkenza sNqtsapálus

F. I nk'sáytkenza sSipá7a

G. I nk'sáytkenza sMésés

H. I nk'sáytkenza sJohn Brigman

I. I nk'sáytkenza sLemxátsa7

J. I nk'sáytkenza sPápcen

K. I nk'sáytkenza sHíksen

L. I nk'sáytkenza sTsupípnec

M. I nk'sáytken saAnn Ottis

N. I nk'sáytken saNgítasq'et

O. I nk'sáytken saMúti

P. I nk'sáytken sa7Amíli

Q. I nk'sáytken saTxwín'ek